

IKOT IDỌK

Matthew 28:18-20; 9:38

ỌYỌHỌ UKPEP-ŃKPO 365

Eke Mkparawa

IKỌ IBUOT: “Emenere enyin ese iñwañ ete ñkpọ adat ke esit ama, ekem ini ukpeñe” (John 4:35).

Jesus amama nditọwọñ,

Enye ‘kpeme mmọ kpukpru,

Obubit ndat-ndat ye afia,

Edi ñkpọ uto Esie

Jesus amama kpukpru nditọwọñ.

Ekeme ndidi nnyin emi isikade ukpep-ñkpọ ke kpukpru Usen Ọbọñ ifiọkke ite ata ediwak nditọ edu ke ediwak itie ke ererimbot emi mifiọkke ñkpọ ibaña Jesus. Mmọ inyeneke ebiet ukpep-ñkpọ Usen-Ọbọñ emi ekpekade. Owo akanam itiñke inọ mmọ ete Jesus akakpa man afak mme idiọk owo, ndien oyom mmọ edu ye Enye ke Heaven. Mmọ ke etie ke ekim ebet uñwana Eti-mbuk ndisiaha nno mmọ. Ata ediwak mmọ eyekpaña enyuñ etak. Nnyin idikeme didie ndida ke iso Abasi, ndien ikpe ibiomke nnyin edieke mitiñke inọ mmọ ibaña Jesus!

Ndo-ndo oro Jesus okoyomde ndidọk ke Heaven, enye ama obok mbet Esie ọtọ kiet onyuñ asian mmọ se utom mmọ edidide. “Mbufo eka ekenam kpukpru mme idut edi mbet Mi, enim mmọ baptism esin ke enyiñ Ete ye Eyen ye Edisana Spirit: enyuñ ekpep mmọ enam kpukpru ñkpọ eke ñketemede mbufo: ndien sese, Ami ndudu ye mbufo kpukpru ini, tutu osim utit ererimbot” (Matthew 28:19, 20).

Ediwak mme ọkwọrọ-ikọ Abasi eka mme esen idut ndisian mmọ oro mikenyeneke ifiọk ibaña Jesus, enyuñ ekabare mme ñwed etop Eti-mbuk esin ke ediwak usem esuan ke mme idut ererimbot; kpa ye oro ekere ete ke mbahare iba ke itie ita ke otu owo ke ofuri ererimbot ikopke mbuk ibaña Jesus. Nte nnyin imañwana ke ofuri ukeme nnyin ndinam ewuhọ emi Jesus ọkọndẹ ke ini Enye eketiñde ete, “Mbufo eka ke ofuri ererimbot”?

Odudu Ndida Nnam Utom

Ke ini Jesus ọkọndẹ mme anditiene Enye uyo ete ebet ke Jerusalem tutu ebọ Uduọk-mmọñ Edisana Spirit, Enye ama etiñ ete ke mmọ eyebọ odudu ndidi mme ntiense Esie “tutu osim utit ererimbot” (Utom Mme Apostle 1:8). Se mmọ ekenyenede ndibọ eyenọ mmọ odudu nditiñ mbuk ke abaña Jesus enọ ediwak owo emi ekeyomde usuñ ekpọñ Jerusalem.

Ukọbọ

Mme utibe mboho ema eda itie ke Usen Pentecost ama ekebe, ke ini mbet esie owo 120 ekebode uduọk-mmọñ Edisana Spirit. Peter ama akabare edi akwa ọkwọrọ-ikọ Abasi ini kiet, ndien owo 3000 ema ekabare esit ke usen kiet. Mbet ema edat esit ke edim Edisana Spirit Abasi, ñko ediwak, nditọ Abasi ema ekop inemesit ndisuhọ ke Jerusalem man eka iso ebọ edidiọñ. Edi se Jesus ọkọdọhọde ekedi.

Ekeme ndidi mbet ikọfiọkke ite ini ama ekem ndika, edi ke ini mme Pharisee ema eketọñ ndimum mme owo nsin ke ufọk ñkpọkọbi, ndusuk ewot mmọ ke ntak mmọ ndinim Jesus ke akpanikọ, mmọ ema ekpọñ Jerusalem esuana eduk ke ediwak mme obio. “Ndien mmọ ewọñ ekekwořọ ikọ ke kpukpru ebiet, Ọbọñ onyuñ anam utom ye mmọ, onyuñ ada mme idiọñ eke esañade ye erikwořọ ọsọñ ikọ mmọ” (Mark 16:20). Jesus ama etiñ ete Imọ iyeka ye mmọ, ndien Enye ama anam ntre.

Ikot Ndika Europe

Ke Paul, owo mbet ama akakabare esit, enye ama anam isañ ukwořọ-ikọ utim ikata. Ke ebiet ekededi enye akakade, enye ama etiñ ọnọ mme owo abaña Jesus. Ke okoneyo kiet ke Troas, enye okut ñkukut, owo Macedonia kiet ke ada ebeñe enye ete, “Be di ke Macedonia, dinyaña nnyin” (Utom Mme Apostle 16:9). Paul ama ọfiọk ini kiet ete ke ikot emi oto Abasi, ndien enye ye nsaña utom esie ikabiatke ini ndibe ñka Macedonia. Emi ekedi eritọñ utom ukwořọ-ikọ Abasi ke Europe.

Ediwak owo ema ebọ erinyaña oto ke ukwořọ-ikọ mbet, edi idighe kpukpru owo ekenyime ukpep-ñkpọ mmọ. Ndsuk owo ema eyat esit tutu esin Paul ye Silas ke ufọk-ñkpọkọbi, edi oro ikọbiọñke

mmọ ndikwọrọ ikọ Abasi. Abasi ọkọdọn mmọ ekwọrọ ikọ enọ mmọ emi mikọfiokke nkọrọ ibañā Jesus, ndien mmọ ema enam se ekekeme nditiñ Eti Mbuk, ikereke ibañā ufen oro mmọ ekenyenede ndibọ.

Edikañ Idem

Ediwa idem edi Spirit ata ọkwọrọ-ikọ Abasi. Enye edi owo emi ebeñede idem ndibiom ukut ke ntak Jesus edieke anade edi ntre. Enye iyomke utip ererimbot. “Ke ndikokut owo emi ọbọde erinyaña asakde imam, edi se iwutde ete ke nwa-idem ọkwọrọ-ikọ ikwọrọke ikpikpu. Enye ebeñe idem ndikpọn ufok ye kpukpru nkọrọ inemesit eke edude, mme ufan ye oruk, man aka ke ebiet eke Abasi ọdọnde enye ete aka.

Man owo edi ọkwọrọ-ikọ eke odorode Jesus udori, enye enyene ndibọ erinyaña ukpọn (efen ke mme idiok-nkọrọ esie); enyuñ eyet enye asana (enam esit asana) oto ke mfon edinam-asana. Enye nko oyom Uduok-mmọn Edisana Spirit ukem nte mbet ekeyomde ke usen Pentecost mbemiso mmọ etoño ndidi mme ọkwọrọ-ikọ Abasi.

Ke akande oro, enye enyene ndinyene ima ye mbom nno mme ukpọn mme anditak. Ediwak mme ọkwọrọ-ikọ esitiñ ete ke owo ikemeke ndida ata ima emi owo enyenede onọ eke mmọ owo nsine ke idem nte ekura.

Owo ekeme ndidomo ndinam nwut ete ke imọ imenyene mbom inọ otu eke imọ isede ibañā, edi mme owo oro eyefiok mme enye anam ntem ke ofuri esit esie, sia enye amade mmimọ ye ukpọn mmimọ, mme edi ke ntak efen.

Ọkwọrọ-ikọ enyene ndifiok nte ke mme owo oro imọ ikwọrọde ikọ inọ edi irenowo, ye iban ye nkpru nditọ emi Jesus akakpade ke ibuot mmọ. Jesus iyomke baba owo kiet ke ofuri ererimbot atak. Enye akayak uwem Esie man afak nnyin, nko Enye oyom nnyin iyak uwem ke ndinam nkọrọ nno mmọ efen. Edioñ nnyin man idi edidioñ inọ mmọ efen. Nnyin inyene ndibeñe idem ndikut ukut ye mmọ oro idomode ukeme ndiñwam. Oro iwọrọke eyom nkọrọ eke okponde akaha eto nnyin.

Jesus ọkọkpọn utibe ebekpo Esie emi kpukpru mme angel etuakde ibuot enọ Enye, edi edidu ata uwem nsuhore idem mi ke isoñ, Enye ikoduñke ke mme ikpọ ufok ndidem, mme ke nsōñ urua ufok mbon inyene, edi okoduñ ke nkpru ufok ye mme ọkọ iyak emi mme ọwọrọ iso owo ke ererimbot ekesede ke ndek. Enye ekedi uwut-nkọrọ onọ nnyin; onyuñ oyom nnyin nko itiene enye.

Ediwak Usen

Ke ini mme ọkwọrọ-ikọ Abasi ekewọrọde eka isañ ukwọrọ-ikọ mmọ ke idut mme okpono-ndem, nkọrọ nte isua ikie emi ebede, me akande oro, mmọ ema ekut ediwak owo emi mikenyeneke usem eke ewetde-wet. Mmọ ikekemeke ndikot Edisana Nwede Abasi ye mme nwede ikọ Abasi eken. Mme ọkwọrọ-ikọ emi ekenyene ndisuhọ ke idut usem emi ndikpep usem mmọ, tutu ekeme ndida usem oro ntiñ ikọ ye mmọ. Ke oro okurede, mmọ ekenyene ndibop mme ikọ ke usem emi tutu ekeme ndiwewet enye. Nko enye ekenyene ndikabare ofuri Edisana Nwede Abasi me ubak esie, nsin ke usem se ema ekewewet. Ke ediwak idaha, ekekabade mme ikọ ke Edisana Nwede Abasi nte ekemde ye usem mme idut mme ọkwọrọ-ikọ Abasi ekedude. Nte uwut-nkọrọ, ikọ emi, ‘erōñ’ ke usem idut Iceland. Mbon idut oro ikpọfiokke se ọwọrọde edieke ọdọhọde ete Jesus edi eyen-erōñ Abasi. Mme anditoño utom ndikabare nwede ekesida ikọ emi “Akamba unam mmọn” ekama. Ikpọ “unam mmọn” emi ema ewak ke mmọn ke idut Iceland, nko mbon Obio ema ekeme ndifiok edieke edade oro edomo ye “erōñ Abasi.” Ọkwọrọ-ikọ emi ekenyene ndikpep mme owo ndikot ikọ Abasi. Ikedighe utom eke enamde usop-usop, ama ada ediwak isua ọkpọsōñ erikpep ye akam ye uñwam Abasi ndinam usen edi se ewetde-wet ye ndinọ mbon idut oro ikọ Abasi ndikot. Mme ọkwọrọ-ikọ ekenam oro eto akwa ima emi mmọ ekenyenede ebaña mme ukpọn owo, nko mmọ ekeyom mmọ efiok usuñ uwem nsinsi. Mme owo ke ata ediwak idut ye usem ekot nwede Abasi mfin oto ke edinam akpanikọ mme akpa mme ọkwọrọ-ikọ Abasi. Nnyin imekeme ndinọ nwede Abasi nnyin esok mmọ man añwam mmọ ndidi ata nti mme anditiene-Christ koro mmọ eñwen ema ekpep mmọ ndikot nwede.

Utom oro itreke. Ke isua ke isua, mbufa usem ke eduk edi, ndien ekabade Edisana Nwede Abasi esin ke nkọrọ nte usem idut 197. Idut tosin kiet ye efut esuk enyene nwede kiet ke Edisana Nwede Abasi emi ekabarede esin ke usem mmọ. Kpa ye oro, imekere ite nkọrọ nte usem idut ewakde ekan 1700 iduhe ke nwede Abasi.

Ndusuk mme ọkwọrọ-ikọ, ke mfihe esit mmọ ndisian mme okpono-ndem mbaña Jesus, eda “usan utiñ ikọ etiñ ikọ Abasi enọ mmọ. Ndusuk ke otu mmọ eyeka ke mme ebiet eke otimde oyom usuñ, emi owo miwetke usem mmọ, mme ebiet eke mmọ minyeneke Nwede Abasi emi ekabarede ke usem idut

oro, ndien ekut owo eke ekemedede ndikop usem idut oro ye eke ọkwọrọ-ikọ esemde. Enye ndien eyekabare etop Eti-mbuk esin ke ukwak utiñ-ikọ, ndien eda mme ikọ oro esin ke usan utiñ ikọ enọ esọk mme owo eke mikopke ñkpọ ibaña Eti-mbuk emi ke usem mmọ. Mme ọkwọrọ-ikọ eken eda ukwak-ubre-ikwọ eke ekamade ke ubọk ebre etop Eti-mbuk erinyaña owo nsio ke idiọk-ñkpọ enọ mme anditak eke mikenyleneke ifiọk emi.

Usem Eke Spirit

Usuñ ekedede eke ekedade esian mme owo ebaña Jesus, ekedi Spirit Abasi ekenyene nditiñ ikọ ke esit owo mbemiso mme andikop ebọ erinyaña. Spirit iyomke akabare ikọ. Ọkwọrọ-ikọ ekeme ndibọn akam ọtọ kiet ye okpono-ndem emi mifiọkke ndikot mme ndiwet, emi kiet mikemeke ndifiọk se eken etiñde, edi Spirit Abasi ekeme ndida esit mmọ mbiba ndian ọtọ kiet tutu mmọ mbiba ekop idara ye emem eke Jesus ọnọde ke ini Enye efende ọnọ anam idiọk eke atuade mkpọfiọk.

Utom Ọkwọrọ-ikọ Ke Ufọk

Utom ukwọrọ-ikọ nnyin ekeme nditọnọ ke edem esa nnyin. Ekeme ndidi nte mbọhiduñ nnyin kebebet owo nditiñ ñkpọ nnọ enye mbaña Jesus. Nso iditibe edieke nnyin itrede nditiñ nnọ enye nte ke Jesus eyenyaña enye osio ke mme idiọk-ñkpọ esie, ndien enye atak ke hell? Nnyin ikpakam ibọn akam ibeñe Abasi ite ańwam nnyin ndikut owo eke itiñde ñkpọ inọ enye ibaña Jesus, inyuñ ida enye idi ke ufọk Abasi. Nte itọnọde utom usen, yak nnyin ibeñe Jesus ada nnyin osobo ye owo eke oyomde erinyaña onyuñ ańwam nnyin ndisian se idide akpanikọ. Se ikande oro, edi nnyin ndidu uwem eke edinamde mmọ eńwen ekut ete ke nnyin idi nditọ Abasi. Nnyin idi uwut-ñkpọ obio-ubọn Heaven. Nte edinam nnyin owut ete ke nnyin idi nditọ Obio-ubọn Heaven?

Ndusuk nnyin imenyene udọn nte ikpekade esen idut man inọ uwem nnyin ndinam ñkpọ ndińwam mmọ eńwen ebọ erinyaña, edi idighe mmem-mmem nnyin ndinam ntre. Nso ke nnyin ikeme ndinam? Nnyin inyene ndińwam mmọ oro ekade ke akam, imekeme ndinọ mmọ uńwam ke okuk ye ke edimiñ ñwed Ikọ Abasi nsin ke usem idut efen. Ediwak nditọwọn enyene saña-saña okuk eke mmọ enamde ke ndińwam mme ọkwọrọ-ikọ Abasi. Mmọ enyene ima ebaña nditọwọn eńwen ke idut efen koro Jesus amade mmọ, ndien eyom ndińwam mmọ man ebọ erinyaña.

Nnyin inyene ndisin ọkpọsọn ifik ke akam inyuñ inam akpanikọ. Abasi akpakam ańwam nnyin ndiduok mmọn-eyet ke abaña mmọ eke etakde, inyuñ ikpe Abasi ubọk ndinọ owo ndińwam mmọ mbemiso Jesus ọtọnọ ntak edi.

Yak ibọn akam emi ibuk miduhe ntem ite, “Se mi mi. Ọbọn dọn mi.”

Akparawa kiet akanam utom ke ofuri odudu esie man anam mkparawa eken ekop inem ke utom ukwọrọ-ikọ Abasi. Enye ama ekekere ete utom imọ ke ufọk okpon akan nte ikpọkpọnde enye.

Edi, baba owo kiet ikemeke ndinyime ndiduk ke ińwań utom ukwọrọ-ikọ ibọhọke ke okoneyo kiet enye ofiori, “Se mi mi, Ọbọn, dọn mi.” Ndien mmọ eken ema ekpebe eti uwut-ñkpọ esie enyuñ enyime ndika ebiet ekedede Ọbọn edidọhọde mmọ eka. Akparawa emi ama ọsọnọ ada ke nyakidem esie, ndien idahemi enye anam utom Abasi ke India, ke etiñ ọnọ mme anditak abaña Jesus.

Edibak Mbeñe-idem

Baba owo nnyin mi ikprike ikaha ikan ndiyak uwem ke ntak ukwọrọ-ikọ Abasi. Ke ima ikebem iso ibọ enọ mfọn ita, nnyin inyene ndika iso mbọn akam, man Abasi ańwam nnyin ndikpep ikọ Esie, onyuñ ọnọ nnyin ifiọk ndifiọk ñkpọ mbaña mmọ oro inyenede mbiomo ke esit ibaña. Nnyin imekeme ndikpep usem ye edu-uwem mmọ oro nnyin ifiọkde ke Abasi oyom nnyin ika do. Edi ke kpukpru idaha, nnyin inyene ndiyom nda-usuñ Abasi. Ediwak ñkpọ edu emi nnyin inyenede ndikpep nto Abasi oto ke ini ye mme ñkpọ oro isańade ibe. Abasi ekeme ndibeñe nnyin idem abaña utom Esie etiene nte nnyin iyakde idem nnyin inọ Enye ke se edede Enye oyomde nnyin inam.

“Ebeñe ndien Enyene-idọk ete, Enye osio mme anam-utom ọdọn edi ke idọk Esie” (Matthew 9:38).

MME MBUME

1. Jesus ọkọdọ́n mbet Esie eka ewe idut?
2. Nso ikedi ntaḱ emi Jesus ọkọdọ́họde mbet Esie ete ebet ke Jerusalem?
3. Nso ikanam mbet ekpọ́n-Jerusalem?
4. Nso etop okoto Macedonia etiene Paul?
5. Siak ndusuk nti edu-uwem ọkwọ́rọ-ikọ Abasi.
6. Nso ekọm-urua ke Jesus ọkọnọ ke ibuot nnyin?
7. Ke nso usuń ke ekesinam mme okpono-ndem enyene Edisana Nwede Abasi?
8. Utom ukwọ́rọ-ikọ nnyin enyene nditọ́nọ ke mmọ́n?
9. Didie ke ikeme ndinam utom ukwọ́rọ-ikọ ke ufọk?